



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Punjab election thinenba ya constitution nung aibelenba lir: Khan

Mesut Ozil asaya nungi anener



VOL. XX NO. 161 (ADOK 161) DIMAPUR ROGONÜ (FRIDAY)

METSÜREMI (MARCH) 24, 2023

₹ 5.00

## NLA nung Asür Yollow Konyak nem akum tetushi agütsü

**Dimapur, Metsüremi/March 23 (TYO):** 14th Nagaland Legislative Assembly ajanga taoba MLA aser Minister, Y.M. Yollow Konyak nem akum tetushi agütsü, shiba March 22, 2023 nü asü.

worker ka ama nürburtem asoshi Konyak-i shilem tulu agiba teti asen molungjang nung alitsü, ta pai ashi.

NLA züngsem temi asür nem akum agüja minute ka ola madoki mokrema liasü.

NLA Secretariat, Kohima nung March 23, 2023 nü NLA Speaker Sharingain Longkumer-i tasüba osang lemsatepba mapang Y.M. Yollow Konyak ya bendanga agütsüba lenir ka liasü, shibai nürburtem asoshi anibelem mesasai inyak aser pa asüba ya melentsü makokba takoksa lir, ta ashi.

Secretary-in-Charge, NLA, Khruohituonuo Rio-ia Nagaland Governor-i The Nagaland Groundwater (Regulation and Control of Development and Management) Bill, 2020 aser The Nagaland Fiscal Responsibility and Budget Management (5th Amendment) Bill, 2022 molunga agizükba indang osang agüja liasü.

Yimten yimsüsür aser social

## NSCN-K pur yimjung nung ki azüngtsüdang AR temi nokdang

**Dimapur, Metsüremi/March 23 (TYO):** Thilixu Village Council ajanga ainshitsütsü ashiba ama ceasefire yimya nung NSCN-K (Khango) pur March 23, 2023 nü Thilixu village nungi parnok indang designated ceasefire monitoring cell belena liasü. Iba mapang ceasefire agreement liaka Assam Rifles temi NSCN-K (Khango) pur meyong gari ka anendaktsü aser Thilixu Village Church telungi anir ai.

Council, Thilixu Youth Front aser Sumi Totimi Hoho Thilixu ajanga meinoktsü.

Osang ajanga ashiba agi, March 18, 2023 nü NSCN (K) nungi telok ana tsüngta tepang agi asatop aser mapang tatsüka lir Thilixu village nung NSCN-K (Khango) ceasefire monitoring cell anasa khatapa liasü.

Telok ana tsüngta injang khashishiba sülen Thilixu Village Council ajanga NSCN-K (Khango) dang monitoring cell azüngteta danga leni belener aotsü metetdakja liasü.

Ghonda aika sepaitem den jembishinüba sülen NSCN-K (Khango) telok ya Thilixu Village

## Department balala indang Annual Administrative Report agütsü

**Dimapur, Metsüremi/March 23 (TYO):** Nagaland Secretariat, Kohima nung tang temendak 14th Nagaland Legislative Assembly indang mezüngbuba session tenzüker Brehostibarnü Chief Minister, Neiphiu Rio-i item Departments indang Annual Administrative Reports 2022-2023 agüja liasü:

Kasa mapang Department of Planning & Co-ordination, Border Affairs, Public Health Engineering and Cooperation Department, Rural Development aser State Institute of Rural Development indang Annual Administrative Reports benoka liasü.

Chief Minister, Neiphiu Rio-isa House nung Nagaland Information Commission Annual Report 2020-2021; Nagaland Information Commission Annual Report 2021-2022; Audit Report of Samagra Shiksha for the year 2021-2022 aser Nagaland State Disaster Management Rules 2011 benoka liasü.

Rio-isa Nagaland Goods and Services Tax (Sixth Amendment) Bill, 2022 aser Nagaland Fire & Emergency Services Bill, 2021 benoktsü atema leave agütsütsü benok aser House-i Bill ana ya benoktsü molunga liasü.

- i) Geology & Mining
- ii) Labour
- iii) Evaluation
- iv) Art & Culture
- v) Science & Technology
- vi) Municipal Affairs
- vii) Water Resources
- viii) Animal Husbandry & Veterinary Services
- ix) Urban Development
- x) Excise & Prohibition
- xi) State Council of Educational Research & Training (SCERT)
- xii) Department of Under Developed Areas (DUDA).

## March 30 & 31 nü CAT indang Circuit Court amentsü

**Dimapur, Metsüremi/March 23 (TYO):** Department of Personnel & Administrative Reforms ajanga sangdong ka nung ashiba agi, Central Administrative Tribunal, Guwahati Bench indang Circuit Court ya March 30 aser 31, 2023 anogotem Gauhati High Court, Kohima Bench indang Court Room No. 4 nung amentsü.

arutsüpuri iba sangdong meteta amalitep akatsü aser CAT indang Circuit Court matsüngdang shia aliba anogotem nung arua nokdaksü metetdaksür, ta sangdong ajanga ashi.

Maneni Advocate/Party/Litigants shirnoksa application tasen agütsütsü molunga ali, parnoki Circuit Court mapang kasahi inyaktetsü, ta sangdong ajangasa ashi.

Advocate/Party tem tsüngtong

## Assembly nung Fire & Emergency Services aser GST (6th Amendment) Bill benok



Nagaland Secretariat, Kohima nung March 23, 2023 nü 14th Nagaland Legislative Assembly indang mezüngbuba session tenzüker asemnü buba nung tangokba noksa nung angur.

**Kohima, Metsüremi/March 23 (TYO):** Nagaland Chief Minister Neiphiu Rio-i Brehostibarnü Assembly nung The Nagaland Fire & Emergency Services Bill, 2021 aser Nagaland Goods and Services Tax (Sixth Amendment) Bill, 2022 benoka liasü.

Fire & Emergency Services Bill benokba mapang Rio-i ashiba agi, state nung fire & life safety measures tem yanglutsü, azüoktsü, amshitsü, ketdangtsütsü aser inyak tenzüksü nükjidong nung Nagaland Fire & Emergency Service Bill, 2021 ya benok.

"Tang terenlok maparen ainba aser urbanization kanga kera aoba ajanga state nung jila tem nung ki o jen terenlok tsütsü kanga junga ainba angur. Ajisüaka sorkar meyong aser nija indang ki o jen atongtepa yangluba nung takum kumzüksü aser mi lendong nungi jenbuttsü asoshi ozüng maliba yong state nung küm ishika tsüngta kitsük-kirong lendong aser danga lendong adoka nisung takum samaba den ki o jen raksaba osang lir," ta pai ashi.

Item lendong ajemdaktsütsü aser state nung nürburtem kumzüka ayutsü mechi Nagaland Fire & Emergency Services Bill, 2021 benoktsü tim ta angateter, ta ashi.

Senotsü tsütsü timtem ajuruba atema Rio-i Nagaland Fire & Emergency Services Bill, 2021 ya tang aliba Home Department indang administrative set up ajanga ketdang asütsü aser Bill maka kuma inyakba nung senotsü tsütsü timtem malitsü, ta ashi.

House nung Nagaland GST (Sixth Amendment) Bill, 2022 benokba mapang Chief Minister-i ashiba agi, Goods and Services Tax (GST) ya July 1, 2017 nungi mapa kuma inyaka arur.

GST nungya Central Goods and Services Tax aser State Goods and Services Tax lir. Central sorkari Finance Act No. 6 of 2022 ajanga Central Goods and Services Tax Act, 2017 ya tera melenshi. State sorkaria State Goods and Services Tax Act ya nung melenshitsü nüngdaker.

"Legislative Assembly senden

meliasü aser iba maparen ya rongdak mapa ka asünung Nagaland Governor-i Constitution of India indang Article 213 indang clause (1) kübok mela aliba tashi amshia Nagaland Goods and Services Tax (Sixth Amendment) Ordinance, 2022 ya November 11, 2022 nung benok aser Nagaland Gazette Extraordinary nung sangdong," ta Rio-i ashi.

Nagaland Goods and Services Tax (Sixth Amendment) Bill, 2022 ajanga Nagaland Goods and Services Tax Act, 2017 ya tawajemba akumtsü, ta ashi.

Senotsü dak sendakba nung Nagaland GST (Sixth Amendment) Bill yagi state indang Consolidated Fund indang expenditure nung mokongshitsü, kechiaser iba Bill ya tang aliba administrative set up ajanga inyakyonga aotsü, ta ashi.

Iba sülen bill ya March 27 nü asadanga agizüksü aser temelenshitsü lira itemji Hokulbarnü teroto (12:00 ako) tashinung agütsütsüla, ta NLA Speaker Sharingain Longkumer-i metetdaksü.

## CSR Compliance & Project Management atema training agütsü

**Dimapur, Metsüremi/March 23 (TYO):** Investment & Development Authority of Nagaland (IDAN) ajanga CSR Compliance & Project Management atema capacity-building training ka Capital Convention Centre, Kohima nung March 23, 2023 nü agüja liasü.

Joint Secretary, IDAN Reny Wilfred IAS ajanga CSR projects indang onük nung Northeastern states aser Nagaland nung tali rangloker jembia liasü.

CRS nung ananü capacity building training ya Nagaland nungbo mezüngbuba alitsü aser iba training ya sensaksemba sentong ka alitsü, aser ibaji ajanga Nagaland terenlok asoshi NGOs tejangraba angatetsü aser nürbur asoshi tajangzük akaba project tem agütsütsü, ta pai ashi.

Iba training yagi tebilemstü khuret balala nung telangzüba aser lenmang sayutetsüla, ta pai ashi.

NGOs aser shilem agir temi project yangluba, DPR yangluba

asur CSR donors tem den jembiba nungi tenzüka project mapa kuma inyakba aser ketdangtsüba tashi, IDAN ajanga hadir aser yimya ajak agütsütsü, ta pai ashi.

Nüngdakba ajak awajema NGOs tem yaritsü atema IDAN ajanga CSR team ka tentetsü, ta pai metetdaksü.

Iba sentong nung CSR Manager, IDAN, Chichanbeni Kithan-i ashiba agi, NGOs aser Corporate Social Responsibility (CSR) nung rangloker iba capacity-building training ya ayongzük.

Sustainable development, lipajen tsütsü tayongzükba aser nürbur ajungtsü asoshi inyaksangshiba nung NGOs temi tongtipang shilem agir, ta lai ashi.

NGOs nung shisatsü peria lir aser takotet nisungtem lir aser itemji ajanga company temi 'local context' angatetba nung yarir aser tongtipang tenüngdakba tem jangjateter. Ajisüaka NGOs tem rongsen lenmang peria maliba

ajanga aiben tetsükdaktsü ajurur aser iba yongji parnok nükjidong metongteti yutsür, ta ashi.


Anungji mission tem tajungtiba nung inyaktetsü mechi parnoki rongsen aser danga stakeholders tem den külemi inyakttsü nüngdaker aser iba atema CSR ya lir, ta lai ashi.

Küm ishika tsüngta shishilempaba tsütsü Corporate Social Responsibility ya tongtipang kumogo. Iba ya ajanga company temi senotsü amshiba kisüng masü saka nürbur angateta aser lipajen wazüka yua inyakba tem tali jangjatsür, ta ashi.

CSR initiatives ajanga NGOs mapa nung yaritsü atema businesses/corporations temi senotsü, technical aser danga lenmang nungi yarir, ta Chichanbeni-isa ashi.

Iba sentong tenzüka tongti tejaoker Reny Wilfred IAS, Joint Secretary IDAN ajanga capacity building center tasenba virtual yimya nung semzükja liasü.

# Aghn aser staff temi Martyr's Day ayongzüka amung



Angh La. Ganesan aser staff tem Raj Bhavan, Kohima nung March 23 nü Martyrs Day amungba noksa nung angur.

**Dimapur, Metsüremi/March 23 (TYO):** India nüjiso atema raraba mapang tongtibang shilem agir lanur asem; Bhagat Singh, Shukhdev Thapar, aser Shivaram Rajguru nung biletmeta Raj Bhavan, Kohima nung March 23 nü Martyr's Day ayongzüka mungogo.

Nagaland Angh den Raj Bhavan staff temi item nüjiso atema raratem nem aküm tetushi agüja liasü. Sentong nung o tatsüka jembiba mapang Angh-i, Martyrs day kodaser amungtsü tenzük iba indang lemsatep. Paisa, lanur dang

süaka linük asoshi taküm bendanga agütsürtem biletmeta linük ajunga nung iba anogo amunger. Parnoki yagi nüjiso atema raratsü asoshi lanur tetsür aser teburtem aika ajungmesoa liasü, ta ashi.

Sentong nungsa Commissioner and secretary to Governor Wezope Kenye-i, iba anogo amungba ya koda tongtibang iba indang o tatsüka jemi aser ashiba agi, iba anogo ya linük nüjiso atema taküm bendanga agütsüba tasü tait nisungtem biletmeta parnok nem aküm tetushi agütsüba

anogo ka lir ta ashi. Paisa, parnoki taküm tenla agütsüba ya amajok masü asü, kechiyong iba ajanga India nung revolution milak jangrudaktsü aser nüburttem bendanger tashi anema nokdaktsü tenzük, ta ashi. Kenye-isa, parnoki parnok taküm densema linük asoshi ajak bendanga agütsütsü mulunga liasü ta ashi. Item tasü tait nisungtem yagi, lokti nung tebandang aliba, ochi obendang magütsüba aser nüburttem rishikangshiba anema nokdak aser iba atema parnok taküm dena bandanga agütsü.

Maneni pai, nüburttem nüjiso atema raraba tetsür aser teburtem ajak biletmeta aküm tetushi agütsütsü nungdaker ta ashi. Shahee Diwas ya biletmeta anogo ka dang masü saka nüjiso atema raratem tamendakdak akangshiba anogo ka lir ta Kenye-i ashi.

Pai, parnoki pei taküm bendanga agütsüba ajanga ajungmesotsü aser India tajungba küma yangertsü atema maneni inyaksüla, kong lisopurtem kecha tebandang malitsü, ta ashi.

# Chumoukedima DC-i senden ayonger

**Dimapur, Metsüremi/March 23 (TYO):** Chumoukedima, Deputy Commissioner Abhinav Shivam, IAS-i sangdong ka ajanga, Nagaland nung taruba G20 Summit dak sendakba nung onük balala sensakasemtsü atema March 24 nü DC Chumoukedima Office Chamber nung anepdang 10:00 ako nungi tenzüka senden ka amentsü ta metetdaktsüogo.

Senden nung teküböklen agüja aliba ketdangsürtemi tamakok maludaktsüi arua shilem agitsü metetdaktsüogo.

1. District Cultural Officer, Chumoukedima
2. District Tourism Officer, Chumoukedima
3. The Joint Director, NEZCC
4. The DPRO, Chumoukedima
5. District Horticulture Officer, Chumoukedima.

# KTABA-i pelaba lemsatep

**Dimapur, Metsüremi/March 23 (TYO):** Jalukie Town Ao Baptist Arogo ajanga arogo quarter aser office yangluba mapang arogopur aser adianu temeimertem kwikati arogo meima Tsüngrem tenung nung nebu, shisatsü, rongsen aser sarasadem agi yaritepogo, arogo tenung nung nenok ajak dang pelaba lemsateper, ta Pastor T.Yanger Imchen aser

Secretary Alemwati Longchar nati külem sangdong ka ajanga metetdaktsü.

Nenok tenla tulu ajanga mapa takok ngua tempangtetogo. Nenok mapa tajung asoshi Arogoi kanga pelar. Teyanglur Tsüngremi nenok taküm aser kibongtem ajak moajangma ta arogoi sarasademtsür, ta kasa sangdong ajangsa lemsatep.


# Air India Cabin Crew shimer

**Dimapur, Metsüremi/March 23 (TYO):** Tuensang Deputy Commissioner, Nokchasashi NCS-i sangdong ka ajanga April 20 nü Emporium Skills Training Institute, Dimapur nung Air India-i Cabin Crew (tetsür) atema recruitment drive ka ayongzüka agitsü ta metetdaktsü.

arishi küm 18 nungi 27 tsüandang asütsü nungdaker. Qualification ji class 12bosa ajanger alitsüla aser tar (height) 155cm bosa astüla.

Iba drive nung shilem agitsü jangrartemi April 15 nü tashi nungbo Whatsapp (8730899943) ajanga osang tejangja (Name, Height, Pass qualification) yoktettsü, ta kasa sangdong ajanga metetdaktsü.

# World Meteorological Day ayongzüka mungogo



Director of Soil & Water Conservation S.K. Hekshe-i Directorate Conference Hall nung "Meteorological Report of Nagaland 2022" sayaba noksa nung angur.

**Dimapur, Metsüremi/March 23 (TYO):** Department of Soil & Water Conservation-i ayongzüka March 23 nü Directorate Conference hall nung World Meteorological Day mungogo.

Iba sentong ya "The Future of Weather, Climate, and Water across Generations" omen nung ajemdaker munga liasü.

World Meteorological Day sentong ya Joint Director aser State Nodal Officer for Meteorology Rongsenlemzung lenisüba nung agi aser pai ashiba agi, agriculture meteorology nukjidong tongtibangtibaji, alu nung tsünusenpongtsü takokba tashi timtiba adokdakja, rongsen aazüktsü aser alima nütünyongyongyuk renlokyonga aoba mesütsü atema timtem ajangshitsü aliba tajemba kümdaktsütsü asoshi takokba

tashi shisatsü agütsütsü asoshi lir.

Sentong nungsa Director of Soil and Water Conservation S. K. Hekshe-i o tatsüka jembiba liasü. O jembiba mapang pai, lokti tekümzüka kübok toktsütsü aser ajangzükdaktsütsü atema Meteorological and Hydrological Services koda tongtibang iba indang lemsatep. Paisa, World Meteorological Day amungba ajanga alima tzi mopung melenshiba indang metetdaktsür aser nüburttem nem global warming aser yipru mopung, menoknok amala lendong tali küma aoba iba amala meteorology tatalokbatem indang nüburttem nem tangazükba agütsür, ta ashi.

Paisa, tsüngsang mopung aser mongpu aser water cycle ya taruba kümtem tsüngda

taoba mapang dang nungi balaka ka akümsü ta ashi. Item temelenshi dak sendakba nung weather, climate aser hydrological services yagi iba dak sendaka aliba tetsükdaktsütem ajangtettsü atema nüburttem nem teyari agütsütsü ta ashi.

World Meteorological Day amungba nungdem nung Director-i, Meteorological report of Nagaland 2022" ta nungja agütsür kaket tila ka saya liasü, koba Department kübok Soil Survey and Land Use Planning Wing (SSLUP)-i publish asüba lir. Iba kaket sayatsüba mapang Director-i iba mapa tajung asoshi team ajunga nem tenüngsang agüja liasü.

Maneni sentong nung mendenbubai tepela anküp o jembiba liasü.

# NDPP tir-i asükhü lemsatep

**Dimapur, Metsüremi/March 23 (TYO):** Nationalist Democratic Progressive Party (NDPP)-i sangdong ka ajanga, taoba Minister Y. M. Yollow Konyak Delhi nung yashi asüba osang angazüka mang ayimba lemsatepogo.

ka aser legislator ka ama pai mapa tajung inyakteta toktsübatem teti menungra biletmettsü.

Asür Yollow ya taküm aliba tepeyong indang indaga liasü ta pa jangja alirtem ajaki meteta lir.

Ni aser NDPP kübok telen ajak tenung nung asür kinungertem den asükhü lemsateper. Tulusang Tsüngremi mangyim jashi mapang nenok nem anisüngzüak agüjang ta sarasademtsür. Asür tanüla teti tatem makadak anisüngzükdakjang, ta NDPP tir Chingwang Konyak-i sangdong ka ajanga lemsatep.

Lenir tajung ka ama pa asüba ya Konyak nung atema dang masü saka Naga nung ajak atema takoksa tulu lir. Lokti lenir

# CPO-i Chakhesang MLA 4 nem tenüngsang agütsü

**Kohima, March 23, 2023 (TYO):** Chakhesang Public Organization (CPO)-i Chakhesang MLA pezü nem tenüngsang agütsüba sentong ka ayonga agiogo.

benoka jembitsü nangzüak.

"MLA temi sorkar tajungba nung ketdangsüa aotsü atema public-i yariteptsüla" ta Advisor Khamo-ia ayongzüak.

Chakhesang nung MLA pezü ya Power & parliamentary affairs Minister K.G. Kenye, MLA & NPF Legislature Party leader Kuzholuzo (Azo) Nienu, Civil Administration Works Division & Taxes Advisor Kudecho Khamo aser MLA Dr. Neisatuo Mero nung lir.

MLA Dr. Mero-ia nübortem dang tejakleni arutsü aser külemi longjemer loktiliba ajungtsü atema inyaksü ayongzüak.

Par pezüprongi kechisarena ajak nung lokti tejakleni anir aotsü aser kasa mapang CPO o civil societies-i amalitep alitsü atema ayongzüak.

Iba sentong nung Chakhesang Youth Front (CYF) president Vezhoduyi Nakro, Chakhesang Mother's Association (CMA) president Zhonelü Tunyi, Chakhesang Students' Union (CSU) president Avezo Kevin Kapu aser Chakhesang Clean Election Movement (CEM) convenor Rev. Vezopa Rhakho nungeria o jembiba liasü.

"Public dak sendakba maparen asoshi civil societies aser public-i onok den amalitep alitsüla. Telemtetba magitetba ken o aika lir anungi item ajak koktettsü atema telemtetba tujungtem agitsü mapang tonga aruogo" ta MLA Kenye-i ashi.

CSU president Avezo Kevin Kapu-i MLA tem dang NPSC aser NSSB nung Chakhesang nung retired officers/intellectuals anioktsü atema mepishi.

MLA Azo-ia state assembly nung ozüng alema aruba tebilemetsü aser Register of Indigenous Inhabitants of Nagaland (RIIN) indang onük

Iba sentong nung mendenji CPO vice president Vecito Dozo liasü, CPO president Vezuhu Keyho-i tesentepertem pelaa agizük aser CCRC, Upper PWD Kohima senior pastor Rev. Zhouhuyi Nyekha aser Rev. Khrutsoyi Luro nati sarasadem.



March 23, 2023 nü New Delhi nung linük tatong Tir aser Rajya Sabha Chairman, Jagdeep Dhankhar-i party ajak nungi floor leaders den senden amendang tangokba noksa nung angur.

## Lok Sabha nung o melemtepi sen 45 lakh crore Budget agizükogo

**New Delhi, March 23 (Agencies):** Brihostibarnü Lok Sabha nung o melemtepi sen 45 lakh crore budget agizükogo; Brihostibarnüa Opposition party balala nungi MP temi Adani Group ochimashi ken o bushisügangtsü atema JPC nem agütsüsüla, ta takhangba agüja rongrong adokba mapang nung Union Budget agizük.

Lok Sabha nung Ruling party züngsemtemi, Rahul Gandhi-i pai jembiba o atema tatok meshitsüla, ta takhangba agütsüdang opposition züngsemtemi Adani ken o nung longkak aitba ajanga senden anaben thinenba sülen Demands for Grants and Appropriation Bills benoka liasü.

Ruling aser Opposition MP temi maneni longkak aitba ajanga Budget senden tanabuba shilem ya junga magiteti aruogo aser tang ama Parliament nung o melemtepi Budget agizükba

ya ishiben dang ataloka lir. Senden anaben thinenba sülen nikongdang 6:00 ako nung senden tenzükba sülen Union Finance Minister, Nirmala Sitharman-i o lemtepa vote agütsüteptsü atema 2023-24 kümsük asoshi demands & grants den külemi iba dak sendakba Appropriation Bills benok.

Lok Sabha Om Birla-i ministry ajak indang demands for grants voting atema benokba sülen Opposition MP tem sabang tejakleni oa yimyim ayimandang demands ji agizük.

2023-24 kümsük atema Budget agizükba mapang nungji Ato kilonser, Narendra Modi-a liasü.

Parliament nung two-third majority ajanga 2023-24 budget ji agizük.

February 1, 2023 nü Finance Minister-i tax proposals atema benokba Finance Bill 2023 ya

Hokolbarnü Lok Sabha nung benoktsüa akok.

Joko budget dak sendakba bill ajakji Rajya Sabha nunga benoktsü, saka yangji o lemtepyonga temelenshi kecha makai Lok Sabha nem meyipa agütsüsü, kechiyong itemji 'money bills' ta ajar aser Lok Sabha nung agizükra iba jagi teperi.

Budget senden ya April 6 nü tembangtsü, ajisüaka budget dak sendakba maparen ajak tembangra budget senden iba dang nungjagi tekaraba tembangtsü.

Budget papers nung shia aliba agi, 2023-24 kümsük nung sen crore 45,03,097 indoktsü.

March 31, 2023 nung tembangba financial year nung sen teindokba ajak agi crore 41,87,232 shi asütsü, ta asadangteter aser ibaji 2021-22 kümsük nung indokba dang nungi sen crore 3,93,431 agi teimba liasü.

## KÜM 10 SÜIAKA ONOKI NA MAMATETER

Ajemaluba Tetsü, Tenukümla Jatilar, Kelingmen



23-03-2013

23-03-2023

Tatangdong tetsü, küm 10 tejakdang nai onok toktsür kodanga meshilangtsüba limai oakasa ne ajemalu sempet, temeim aketba, tejungnü aser taremsük shisatsü onoki kodanga mamar. Ne tsüngsü onok asoshi akümüli tepiyong tatishitsü alitsü.

~Ne kinungbu, Chinur aser Semchisemnurtem.

## EC shimba onük nung SC oben-dang sorkari asadangdar: Centre

**New Delhi, Metsüremi/ March 23 (Agencies):** India nung Chief election commissioner (CEC) den election commissioner ana shimba inyakyim dak sendakba nung Supreme Court-i agütsüba obendang sorkari shisadangdar, iba sülen sorkari tim inyaktsü, ta Brihostibarnü sorkari Rajya Sabha senden nung metetdaksü.

Rajya Sabha nung tezüluba nung telangzüba agütsüdang Law Minister, Kiren Rijju-i, tawa Supreme Court obendang ajanga, linük temzüng kübok Arrla 342 (2) den putepa Parliament nung ozüng ka meyangu tashi CEC den election commissioners ji züngsem aseme akümba committee kati benokba nung ajemdaker shimtsü ta metetdaksüogo, ta ashi.

Züngsem aseme akümba committee nung züngsemtemji Ato kilonser, chief justice of India aser Lok Sabha nung Opposition Lenir asütsü, aser Opposition Lenirji melira Lok Sabha nung single largest opposition party nungi lenir asütsü.

"Supreme Court-i agütsüba obendangji sorkari asadangdar, iba sülen sorkari tim mera agia inyaktsü," ta Law Minister-isa metetdaksü.

Rijju-i, Election Commission ya permanent constitutional tentet ka lir, aser iba ya linük temzüng kübok Arrla 324(1) nung ajemdaker tentet, ta metetdaksü.

Arrla 324(2) nungji yamai shia lir, Election Commission tentet nungji CEC ka den election commissioners alitsü, aser mapang shia Tiri züngsem kwi alitsüar latettsü akok. CEC aser election commissioners shimtsüji Parliament nung ozüng ajemdaker shimtsü.

Law minister-i, shidakba agibo Election Commission

nungji Chief election commissioner dang liasü, ajisüaka Commission inyakyim teladak asütsü aser linük nung election junga ketdangsüa agitettsü atema 1989 küm October ita nungi sorkari commissioner ana shimoksema liasü saka 1990 küm January tashi dang liasü, ta metetdaksü.

Iba sülen 1993 küm October 1 nü election commissioner ana shim aser iba mapang nungjagi tenzüka tanü tashi Election Commission nung züngsem yamaji lir, ta pai ashi.

"India linük temzüng kübok Arrla 324 (2) nung ajemdaker chief election commissioner aser election commissioners shimtsü atema Parliament-i ozüng yanglua mali," ta Rijju-i ashi.

Government of India (Transaction of Business) Rules, 1961 indang Rule 8 kübok CEC den election commissioners shimbaji Ato kilonser aser Tir nati agizüksüla, ta paisa metetdaksü.

"Tang tashi nung civil service mesüra India sorkar nung secretary rank/state sorkartem nung chief secretary nungi anisüngzüker alir officer tem election commissioners shimer aser election commissioner asem rongnungji shiba senior sudir paji chief election commissioner shimer," ta paisa metetdaksü.

Tan ita tetenzüklen SC-i, Ato kilonser, Lok Sabha nung Opposition Lenir aser Chief Justice of India densema aliba committee kati benokba nung ajemdaker ang Tiri CEC aser ECs shimtsü, ta obendang agüja liasü.

Justice K M Joseph-i aniba judge pongu aliba Constitution bench-i CECs aser ECs shimba inyakyim nung sorkar tashi mamshitsü nükjiding nung iba obendang agütsü aser Parliament nung ozüng ka meyangu tashi ibaji beshitsü metetdaksü.

**IDBI BANK LTD, Mokokchung Branch,**  
Yongya and Brothers, Imnameren Road, Mokokchung, Nagaland, Pin-798601

**PUBLIC NOTICE FOR SALE THROUGH e-AUCTION**

**SALE OF PROPERTY OF SHRI LANUWAPANG TZUDIR (BORROWER - M/S TZUDIR ENTERPRISES- SMART SHOPPE) SITUATED AT VILLAGE DIPHUPAR, DISTRICT DIMAPUR, STATE NAGALAND -797112**

Securitization & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 nung ajemdaker tsünglanglen sign sua aliba, IDBI Bank Ltd. (IDBI) nung Authorized Officer (AO)-i Lanuwapang Tzudir (Borrower-M/S Tzudir Enterprises-Smart Shoppe) indang kiojen ONLINE e-AUCTION asütsü atema Bids/Offers atema jaoker, kechiyong February 04, 2023 nü AO, IDBI Bank Ltd-i iba kiojen agiadokogo.

**1. Kiojen Osang:**  
Patta No. 139 nung ali 963 Sq.mtrs nung aliba kimong aser kiojen ajak (and as per Jamabandi issued vide Deputy Commissioner order no. VLs-1/2015-D), Pt/110891-95 dated 06th October 2015, Dag No. 25/194, Mouza No.03) aser Patta No. 218, 'K' Khel House no. 78 (as per Land Patta Book issued by Diphupar Village Council) situated at Village Diphupar, District Dimapur, State Nagaland), aser kiojenji East tsütsü: Lhovichhe, West tsütsü: Leishiwon Kumrah, South tsütsü : Bendang aser North tsütsü: T. Athong Tikher nunger kimong agi meketbanga lir.  
Iba kimong nung aliba building ajak den tanga kiojentem, süngdonglidong aser ali nung amenoka aliba machinery ajak densema lir.

**2. 01.03.2023** anogo tashi nung IDBI Bank Ltd. sentsühi **Rs. 21,28,414.29** lir, iba denji **w.e.f. 02.03.2023** nungi telemok aser tanga charges alitsü.

**3. Bid Document ayoktsüji 24.04.2023** anogo nungi **26.04.2023** tashi nung anüngdang **11:00** ako nungi nikongdang **4:00** ako tashi asütsü.

Reserve Price	EMD	Date and Time of Inspection	Last date of Submission of Sealed Bids along with EMD & KYC documents of e-auction	Date & Time
Rs.36,96,000/-	Rs.3,70,000/-	24.04.2023 to 25.04.2023 From 11 a.m. to 4 p.m.	26.04.2023 Till 12:00 noon	27.04.2023 From 11.30 a.m. to 1.30 p.m.

**4. BID DOCUMENT ATEMA TELATETBATEM**

- Iba sale ya E-Auction platform ajanga agütsü, website : [www.eptl.in](http://www.eptl.in) | [www.auctiontiger.net](http://www.auctiontiger.net) through e-auction service provider M/s. e-Procurement Technologies Ltd (ETL or Auction Tiger)
- Tejangrar bidders-i Bid denji külemi EMD & KYC documents (PAN card/Address proof) agütsüsüla. EMD anguba sülen bidders-i user id/password ji e-auction service provider M/s e-Procurement Technologies Limited - Auction Tiger dang nungi valid email id (mandatory for e-auction) ajanga angütsü.
- Tayoktsü aliba kiojen ya "as is where is basis", "as is what is basis", "whatever there is basis" aser "no recourse basis" nung ayoktsü. Dues aliba, statutory mesüra tanü tashi nung aliba tanga dues mesüra tarutsü nung dues atema AO-i kuli magütsü, iba nungji talizüker tenüng nung kiojen transfer asüba nung kongshitsüsa aliba dues densema lir, aser yamaji dues lira ibaji talizükeri agütsüsü. Iba atemaji information agütsüsü atema Bank-i kuli magir.
- Shia aliba kiojenji temalen shia aliba 'reserve price' kübok mayoktsü.
- Iba notice agütsüba sülen anogo terpungo lir sale asütsü.
- Earnest Money Deposit - (EMD) nungji telemok mallitsü. Bids tenzükba anogo nungi tenzükba ita 3 tashi AO-i top three bidders indang EMD ji ayutsü akok.
- Top three bidders tsüngda bid süteptsü atema AO-i melatsüa akok.
- Takok angur bidder jagi sale confirmation mapang nung sale price shilem 25% deposit asütsü (deposit sua ala EMD den tejamba). Sale price indang tanüngba senji sale confirm asüba anogo nungi tenzükba anogo 15 tsüngda agütsüsüla, mesüra AO-i melungba ama mapang atsülangtsüsüa akok. Atakelja aliba mapang tashi nung tanüngba senji deposit mesütra deposit sua aliba senji agiadoktsü, iba nungji EMD sen densema lir.
- Kuli kecha magütsü bid mashie mesüra ajak agizüksü mesüra magizüksü temeden AO dak kela lir. Bids ajak magizükra AO-i SARFAESI Act nung aliba inyakyim mashie ka ajanga iba kiojen ayoktsü temeden lir.
- Bid document nung shia aliba Secured Assets ji sen apuri charges/mortgages nung ajemdaker yangluba lir, aser item osang tejanggaji bid document nung shia lir. Tejangrartemi Secured Assets ji repringshitsü akok aser mepishira AO ket nung aliba mortgaged assets indang records repringtsü akok.
- Secured Assets nungji abelen/metokmeperi/meputep/matoksa kar dang ala nunga mesüra temelaba kar agütsüsa lira mesüra ozüng kübok authority kar indang dues lira iba atemaji Secured creditors-i kuli magütsü.
- Secured Assets ji Secured Creditors dang nungi dang charges aser tetsükdaktsü kecha makai ayoker.
- Stamp duty, registration, expenses, tax liabilities mesüra secured assets transfer atema senotsü ajakji takok angur bidder-i agütsüsü.
- Bid Document ji **Authorised Officer, IDBI Bank Ltd., IDBI Bank Ltd, Guwahati-II, Regional Office Building (4th Floor), G.S.Road, Guwahati-781005, (T) 0361-7141101, email : manojkumar.senapati@idbi.co.in** mesüra Branch Head, IDBI Bank Ltd., Mokokchung Branch, Yongya and Brothers, Imnameren Road, Mokokchung-798601, Nagaland, email : nungsanglem.lamtur@idbi.co.in ajanga angütsü aser [www.idbibank.in](http://www.idbibank.in) ajanga-a download süteptsü.
- Tejangrartemi item contact ajanga longtepreteptsü akok: (T) (M) / email : [utpal.kakati@idbi.co.in](mailto:utpal.kakati@idbi.co.in) / (M) +91 9207057034 / [pradip.mandal@idbi.co.in](mailto:pradip.mandal@idbi.co.in) / (M) +91 6900480609

**STATUTORY 30 DAYS NOTICE UNDER RULE 8(6) OF THE SECURITY INTEREST (ENFORCEMENT) RULES, 2002**

Date : 23.03.2023, Place : Mukokchung Sd/- Authorized Officer



## TIR YIMYIM YIMOBILEM (EDITORIAL)

DIMAPUR ROGONÜ, METSÜREMI (MARCH) 24, 2022

### Asenok yamaisa aotsü nuo ?

**J**oko asen lima nung vote ka jenjang sen meyrirjang tenem tashi tuogo. Ano, vote agütsürji putu yimsüsür süra ajibo jenjang balaka. Iba jenjangjibo lakh dak tema asütsü. Aji oda, asen lima nungi senso candidate ka MLA akümtsü asoshi sen crore terbosa nungdaker. Tetezü asen yimer senso ajak longjemer nisung tajung ka akümüli piyonga sentsü memenoktetsüsa sentsütsür kümdaktsüogo ta bilemdi. Iba tia ya kodang arokaroka bilemdangdir, aya ! asenoka yamaisa maneni aotsü nuo (?) ta mulung animesüngzükteti bilemer. Ano külen sentsütsür akümbajibo yujang, saka asenoki temoatsü agütsür MLA kümdaktsüsang ochishir aser nisung tajungsang to pa sentsü menoktsü merang dang ochimashir auer tetsüdi kümdaktsür. Aji oda, election nung takok ngur MLA akümertema iba ama tia nung alitsüsa kümra, election nung madokertembo kechikoma ka tia nung alitsü (?) ta bilemer mebilemjem shisabolutsüka lir. Iba tensa tia yagi asenok kanga shisabolutsüla. Atangji, election nung adoker aser madokertem atemaji masü saka asenok tarutsü anogotem asoshiang shisabolutsü tuluba lir. Asenok shitakba yamaisa aotsü nuo ? Reprangdangra, election nung toktepertem rongnung nisung shinga anogo aser ita shia senotsü chigu junga arua business inyaker mali. Candidate-tem rongnung tera kaa aiteritemji government mapa inyakdang bendenba rongsen dang, anungji itemji endokmarbo tarulen makatsüba purtem lir aser tanümbajibo kinunger aser medemertem teyari agia toktepertem, anungji item rogotem asoshi sen crore ta masü lakh jia aika asütsü. Ajisüaka, tarulen mali ser election nung sen crore ka ana ta masü ter metsü endoka toktepba süngjangji nübortem asoshi tanang asütsü asü ? Tako asütsü ? Industry tulu lapoka yur mesüra business tulu inyakeritem, shirnok pei mapa nungi küm nung tajangzük sen crore menden nung arur, item atemajibo kecha balaka shisabolutsü mali saka asenok anüng ozü ama anogo shia chiyongtsü kong nungi arutsüar mejangja yimzürtem asoshi sensosangertem zep ta longjemer sen crore ter metsü sentsü tsüdaktsüba mapa ya kechi mapa asütsü ? Atangji, kar atema iba mapaji mapa meinyak ser sen agizüka achitsü yangluba sentong asütsüa akok. Ano, kar atema alima nung makaba tesem aser nisung tenüngtem amshia sen bushitsü bilemba sentong ka asütsüa akok. Ano, kar atemabo iba mapaji mapa inyakba ajak nung Tsüngrem shilem dang nungibo teimba 20 % meshia sarudentsü tenzükba sentong asütsüa akok. Atangji, Nagaland annual report nung item sentongtem ya kanga takok ngua inyakba osangtem lir. Iba jagi karbo sentsü orr külenang ano taruba election asoshia dena bendentetter. Ajisüaka, item ajakji tatem nungbo zero dang nungi teküpbokba nung atemer. Iba jagi asen meyong kiojen aser kimonglumong ajak pi indang kümogo, kechiyong itemji tamasayongi pi meyong agi yangerbatem liasü. Item nungji tan masü, asenokbo ano yamaisa aotsü nuo ? Asenokbo election ya alima tajungba-tajungba küma yanglutsü atema tangatetba agi yimsüsür shimba sentong masü saka vote ayokba aser aliba bazaar-ang ka asütsü nuo ? Asenokbo nübortem jenjang tajungba-tajungba yanglutsütsü bilema yimsü asütsü melen, yimsü asü tepiyong tim masüba len nungi dang sen bushitsüsa akümba tensa nung yasa maneni aotsü nuo ? Asenok ita nung sen meyrirjang ka arulena mali, kechiyong asenok kecha inyaker-a masü, saka election nung sen crore ter metsü endoka election nung toktepba yagi asen taküm, asen kibong, asen yimer, asen nübor aser asen lima jungdi ma ? Iba yagi linük meimer lanur tashitemeteter tajung election-i itetdi ma ? Joko, senso longjemer senso tajung ka taküm tia dang masü saka pei lima dena raksatsüsa lemtetba tamashi mapatem ya anendi. Election nung candidatema sen agi vote malitsü nangzüktepedi aser voter-tema sen yong vote mayoktsü peisasa lemtetadokang. Aji oda, election nung sen agi vote ayokba aser aliba mapatem nokdangtsü asoshi senso lanur tajungtem mitkar kümang. Iba amaisa ao nungbo asenok agi matitsü ! Alima aser nübor meimertem rongnung yimsüsür akümtsü toktepang, saka tang amaibosa mouli aser metoktepli. Joko, talisa asenok Aortem, ojang menendi aser ojang yiradi !

## OLEMSABANG

### NÜJA MEYONG SORKAR MASÜ NÜBUR MEYONG SORKAR ASÜTSÜLA

~ L. Kika Pongener.

(Yashi adok nungi...)

Ano tanabuba nung sobaliba tentet tamajungtiba kaji "VIP Culture" ya lir. Tesuiba sorkar nung iba 'VIP Culture' ya meshi-meshia agientsü atema bangzünga lemtetba osang ngua nübur ajunga kanga pelaseta liogo. Ajisüaka, tebang o agi jembiba dang ashi, tanü tashi nung asangsang (Reality) nung mapa küma inyakba kecha mangur. Talisa, nüburtemi kangasa maginuba kaji, jila tulutem nung yimdongdi lenmang (Main road) nung Gari 'Traffic Jam' sur kanga timtema lia, VIP Convoy ola tulu (Siren) asa-a arur nüburtem timtemba kecha hesap mali VIP tashi sayua, parnok mesuitem tashi nüburtem Gari mapang talangka anendena yutsüba angudang nüburtem kangasa mepelar. Ano mapang kar nungbo, kangasa tesasatsüka, tasütsüsa shiranger (Serious Patient) abenba 'Ambulance Gari' dena VIP Convoy mechi nung mapang talangka anena yutsüba agi shirangerji kangasa tim-atemba aser karbo mozü-ki mapang shitak nung metongtetba agi süa-adokba (Dead) tatalokbatem lir. Ano kanga tesasatsüka, mapang kar nungbo 'Gate' nung VIP Gari nung Ram/Whisky/Beer/Drugs yamala ozüngi memelaba oset bener apoba-a denjia aruogo. Tang Election mapang nunga Senior Govt. Officer kar Gari nung yi bener 'Gate' nung apoba osangkaket nung adokba nguogo. Anungji koba 'Gate' nung sudir süaka tanükertemi VIP Gari-a süang, public Gari-a süang, kata map-sap mali ajunga kanga junga 'Check' asütsüla. Ano benjong-bentsü, mongdangmongji ajak nung 'Tongti tesemdanger'...Tetushi tejaoker'....Alakteta jaoker' etc. Nungja tapu-tapu purateta jaloktsür, VIP-tem dak nungi senotsü angutsü teimla nung jaokba sobaliba tentet ya meshi-meshia agientsüla. Sorkari ayongba benjong-bentsü, sorkari ayongba mongdang-mongchi aser sorkar dak sentakba sentong dak alaka tanga kecha nunga VIP-tem shinga 'Chief Quest' & 'Quest of Honour', mesura nungja tapu-tapu purateta jalokja mejaoktsü aser mamshitsü ta akangakanga bangzünga lemtettsüla.

Aji oda, 'VIP Culture' sobaliba tentet yagi VIP-tem nema timtem kanga agütsür aser linuk terenlok atema aruba sen ajunga angadi nung chireper aser endokmar. Anungji Minister & MLA-tem shinga Chief Quest & Quest of Honour aser nungja balala purateta jalokja, kecha sentong nunga mejaoktsü aser mamshitsü ta temzüng-ozüng akangakanga yanglutsüla. Kechiyong asenoki kanga junga shisadangra, Minister/MLA ka Benjong-bentsü/Mongdang-mongchi kar nung Chief Quest & Quest of Honour jaoka, iba sentong nung adentsü aodangji pa den Police Body Guard Escord Gari ishika adentsü, Concern Department Senior Staff ishika adentsü, Party worker ishika adentsü aser pei yimtsür-yimer lennir tajung ishika adentsü...ta ser Convoy sena aoba nungji senotsü kwika endoktsü...??? Aser Benjong/Mongdang nungjia Donation tajemba agi lakh ka-anabosa agütsütsü. Iba ama mapa nung senotsü endoktsü melena pei Constituency nung terenlok mapa tongtipang kar-ang inyaknungang tajungba asütsü. Ano asen Naga nung nüburtemi angatettsüba kangasa tongtipang kaji, MLA kaji pei yimer meyong masü, Constituency-pur meyong ta metettsüla aser Minister-jibo par Constituency-pur meyong masü, saka Naga nung ajunga meyonga ta angatettsüla.

Item dak alaka, tang tashi asen Naga nung asen lima nung adokba Electric light agi asen lima peria agitsüsa maka, tangar state dang alia atsüker, anungji Doyang Hydro Project amai ano Hydro Electric Project kar yanglutsü sentong nung inoktsüla. Kechiyong linuk ka nung Electric power peria makara tongtipang Factory & Industry etc. kecha tashi-ita mapa meinyaktettsü. Tongtipangsa Electric Power peria makara Hospital-tem nung X-Ray aser Ultra-sound etc. amala machine-tem kecha tashi-ita mapa meinyaktettsü. Anungji tang sorkar tasenba yagi Hydro Electric Project tasen kar yanglutsü asoshi kanga nendaka temulung agüja inyaktsüla. Ano lanur zünger mapa agi matartem (Educated unemployed) mapa angutsüsa Industry & Factory tasen kar lapoktsü lenmang bushitsüla. Kechiyong sorkar Department kisung nung dangbo lanur tazünger ajungabo mapa magütsütettsü. Ano taoba küm Centre sorkari Special Accelerated Road Development Programme in North-East (SARDP-NE) Fund nungi asen state nung lenmang yanglutsü atema sen Crore aika agütsüba osang ngua kanga pelaseta liogo. Aji oda, iba Fund to-agi Centre sorkar nukjidong tonga mapa küma inyakdagi ta nüburtemi tamang akar. Anungji NDPP Party Manifesto nung aliba ama 'Deeds not Words' ... O agi masü mapa agi inyaktsüla. Aser NDPP-BJP Alliance manifesto nung ashiba ama 'Development for All'... Anungji Naga lima kinuk-kisang ajaklen, tesem kar mejetteta masü, saka District ajak nung liromedema terenlok mapa inyaktsüla. Prime Minister Modi-bai 'Change is Coming'...'Temelenshi arudagi'...ta ayimoktsüba ama NDPP-BJP Alliance sorkar ya NDA sorkar den Alliance sorkar asünung PM Modi-ba nukjidong abensadakja temelenshi bener aruba sorkar ka asütsüla.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Nagaland atena oa alir Ao arogo lenirtem longjem



Delhi nung Nagaland atena oa tenteta aliba Ao Baptist Arogo 4 den Fellowship ka nungi tenzükertem adenshia telongjem sentong agiba mapang tangokba noksa ka yangi angur.

**Dimapur, March 23 (TYO) :** Nagaland Atener Aliba Ao Baptist Arogo Telungjem (NAAABAT) tenteter 3 buba lokti senden sentong ka Delhi Ao Baptist Arogo teyari agia Delhi nung tan March 17 nungi 19 tashi takok ngua mongogo. Iba sentong nung ' Temeshi Laishiba Tesayuba den Ao Baptist Arogo Inyakyim Asadangba' omen nung amendaker Jorhat Ao Baptist Arogo nung sannüker Imli P Lemtur aser Dr.Imkongmeren

Longchar nati tongti shilem agia shisalemsatepa liasü. Iba kasa sentong nung Wt.Atola Subong aser Wt.Alemla Longkumer nati anir lokti sarasadem mapang tajung ka agia liasü. Ano, NAAABAT küm ter sülen ta asüba onük nung Ao Baptist Arogo Guwahati nung sannüker Rev.Aowabang Ozükümi tarutsü mangdang aser khuret lemsatep. Amongnü temoatsü sentep Delhi Ao Baptist Arogo purtem den külemi agiba sentong nung

Ao Baptist Arogo Shillong nung sannüker Rev.Dr.Meyu Changkiri-i Tsüngrem o jembia liasü. Taküm 2023 küm Delhi nung NAAABAT senden sentong nung arogo balala nungi tenzükter 32 tashi dena liasü. NAAABAT nung ya tang arogo pezü aser Fellowship ka lir. Itemji Jorhat, Shillong, Guwahati, Delhi aser Bengaluru. Taruba küm NAAABAT 4 buba senden sentong Shillong nung akatsü lemtetogo ta angazükter.

# Israel nung ozüng tasen ka ajanga Khristantem timtemtsü

**March 22, 2023:** Israel nung Bill tasen ka benoka lir, aser iba ozüngji agizükra Khristantemi tangar dang Khristan yimsü agizüktsü ajungshiba atema küm 1 tashi tepuokdak ayutsüa akok. Iba bill ji Ato kilonser Benjamin Netanyahu-i aniba teloktep nung Itra-Orthodox züngsemtemi benok; iba ozüng küboksa Yihuda nung den yimsü dak sendakba onüktem nung o lemteptsü atema Khristantem memelatsü. 'Proposed Penal Law: Amendment - Prohibition of Solicitation for Religious Conversion - 2023' ta ajaba Bill ji United Torah Judaism nungi Moshe Gafni aser Yaakov Asher nati benok. Iba ozüng kübok nisung kari dangi pei tamangba yimsü nisung kar nem agizükdaksütsü merangra temerenshi agütsütsü, ajisüaka iba bill nungji Khristan yimsü dang tetshia lir, kechiyong tawa missionary telok balalai

nüburtem Khristan yimsü dangi meyipdaksütsü atema inyakba kanga bulua kümogo. Iba Bill kübok nisung kati tangar ka ajurua mesüra digital ajanga, mail ajanga mesüra online ajanga yimsü meyipdaksütsü atema meinyaktsüla, aser iba ozüng kübok aibelenerkem küm 1 tashi tepuokdak ayutsü; aser tanur ka yimsü meyipdaksütsü merangra aibelenerji küm 2 tashi tepuokdak ayutsü akok. All Israel News ajanga ashiba agi, "Iba bill nukjidong ya- Yisuji Messiah aser Tsüngrem ta ashitsü atema Yisu (Ibri oshi nung Yeshua) sülen anidakertemi nokdangba amai lir." Ozüng tasenba kübok Israel nung Yihuda nung mesüra Muslim nung den, mesüra tanga yimsü amanger den Khrista osangtajung lemsateptsü atema online videos yanglua prokshibaji ozüng alema inyakba mapa ka

asütsü. Iba ozüng küboksa Yisu Khrista tenzükba wadang, Yisu taküm otsü aser Tasen Lai nung Pai jembiba otem indang kaketem adokba, online ajanga item ocet lemsatepba aser social media nung item indang lemsatepbaji-a ozüng alema inyakba mapa asütsü. Iba Bill benokba ya Israel pusemer America nung evangelical Khristantemi ashishir. Evangelical Khristan lenirtemi yimjak nung Israel Ato kilonser, Benjamin Netanyahu dang iba Bill tagizük, ta mepishidar. Netanyahu aser pai aniba teloktepi yimjak nung aser nija naprongla nung Evangelical Khristantemi US Yihuda nung pusemba ya kanga tongtibang ta shiogo. Tang Israel nung benokba bill tasenba ya America nung Democrats aser Republican napronglai ashishitsü, ta bilemer.

# Congo nung tesüiba hopta ana tsüngda Khristan 72 tepsetogo

**March 23, 2023:** Tesüiba hopta ana tsüngda Democratic Republic of Congo (DRC) kübok Nord Kivu nung Islamic kiralongrar telok- Allied Democratic Forces (ADF)-i Khristan 72 tepsetogo, ta International Christian Concern (ICC)-i metetdaksü. Butembo ji nung Arogo lenir, Mulinde Esembo-i, tesüiba hopta ana ya Congo nung Khristantem atema jashia mangyimba mapang ka liasü, ta ashi. "Anüdoklen DRC kübok jila aser yimtsüngtem naprongla nung

tena kanga mejungi lir. Anogo shia nüburtem tetsübu nung dang alir. ADF teloki tamangertem aika shiruru amai dang tepseter," ta pai ashi. March 9 nü ADF teloki Mukondi area nung Khristan 36 tepset, March 12 nü Kirindera yimdak Khristan 19 tepset aser March 14 nü Mabuku yimdak Khristan 17 tepset; parnok rongnungji Episcopal putir-a ka densema liasü. Mulinde Esembo-i, "Item yimtsüngtem nungi kibong aika

jenogo aser tang yangi Butembo jila nung refugees ama jenoka lidar," ta metetdaksü. "Tesem balala nungi jena arurtem aika yangi jenoka lir, anungji sarasadem den külemi tanga nungdak balala ajanga parnok yaritsü mepishir. Iba dak alia Congo nung tena tajungba akümtsü atema sarasademdaksüner, kechiyong tanü mesüra asung kechi ang ataloktsüar memetetba tena ka nung onok lidar," ta paisa mepishia metetdaksü.

# ANOGO ABEN TSÜNGREM DEN

## Temeim mapa kodang tessama masü 1 Yohan 3: 11-18

Nisung dang masü Kibuba dang tenzükter ama temulung ajunga agi tenzükang. Efesa 6:7

Tsüngsem yanglur kati ashi, "Kü mapaji tanelatem kümzüksüba, saka teintokbaji aatsü asoshi ni tsüngsem ateper." Pa mapaji asangtsü tetemsü, tamang katetba Khrista ka ama pai par kiyonger tsüngsemjia tajungtiba süa ateptsütsüla. Tanela anir aruba aser tsüngsem atepshiba nung tsüngsem yangluri kiyonger dang temeim sayu aser Tsüngremi yangluba apen süoshi aser tsüngsem agütsüba agi Tsüngrem yari. Yisu asoshi asen kiyonger dang meimtsü aser tenzüksü asoshi asenok aja. Asenok temeyoktep telok nung parnok nungdak tepenja lir. Asen ajak talidak ki, chiyongtsü, apen-süoshi, shishilembadak, leman, meti, tezüng, mozü aser aika nungdak lir. Mapa shiai meimchir junga alitsüba nung yarir. Asen mapa ajanga asenok asen kiyonger, shirnok Tsüngremi yanglu aser alanzük, parnok yarir.

Kodang asenoki asen kiyonger adianu ama reprangdir, iba jagi tangar dang nungi balaka kümdaktsür. Asenoki meimer kechiaser asenok Tsüngrem dangi anir arutsü asoshi Khristai asenok dang tama meim. Iba temeim sayutsü leman kaji asen mapa ajanga anogoshia asen kiyonger nungdak nung yaribaji lir. Iba temeim mapa kodang tessama masü.

O Yisu, Nai mapa jenjang angatet. Ibai temeim nung Na aser onok kiyonger atema inyakdakjang. Amen.

## Tanela temeshi medeni sayutsüngi-baji tazüngla: Pope Francis

**March 23, 2023:** Tenzükba wadang junga inyaktsü atema tamangertemi Tsüngrem den sensaksemtsüla, tanela temeshi ajanga pei taküm aser temelungjang meshitetsüla aser tanü lima tensa indang jembitsüla, ta Pope Francis-i ashi.

March 22, 2023 nü Vatican nung aliba St. Peter's Square nung jembidang Pope Francis-i, "Tanela temeshi ya tenzükba wadang nung tongtibangtiba lir. Tanela temeshi medeni inyakbajibo Arogo 'advertise' asüba dang asütsü," ta ashi.

Arogoia mapang ajak nung peisasa tanela nung asentenshitsüla, yamaji mesüra Arogoji museum ka ama dang asütsü, ta pai ashi.

Pope-isa tenzükba wadang inyaktsü jangraba aser Khrista atema kulisüba atema jembia.

"Kulisüba medeni nai tenzükba wadang meinyaktetsü. Kulisüba tetezü- pei taküm nung Yisu Khrista ajuruba aser Tsüngrem O tejangja metetba ajanga tekümtet ngua aliba lir," ta pai ashi.

"Kulisüba nungjisa pei tamang lemsatepba lir, aser ibaji Tebu Tsüngrem, Techir aser Tanela Temeshi jungkai adokdaksüba lir," ta pai ashi.

"Tamang ajanga asenok melenshir, aser ibaji ajanga asen tesendaktep melenshir. Item telatetba aser tangatetbatem ajanga asenoki telemetba agir. Anungji kulisüba nungji pei tamang aser kulisüba naji liromedemtsüla," ta pai ashi.

"Pei amangba ama taküm aliba na tsüngda liromedemba nungji tesünep lir. Yamaji mesüra ajakji anemsü lir," ta pai ashi.

"St. Paul VI-i asüngdangba ama ajaki tasüngdangba asem langzütetsüla: 'Nai sangdongbaji nai amanger asü? Nai amangba ama nai nü taküm liteter asü? Nü libaliro ama nai sayutsüngir asü?'" ta Pope Francis-i ashi.

"Telanzüba temela ajanga asenok melung asütsü makok. Asenoki tanela temeshi mapa



March 22, 2023 nü St. Peter's square, Vatican nung Pope Francis-i lokti den jembidang tangokba noksa nung angur.

nung tamang akatsüla. Tanela temeshi ajanga asenok ajak dak mapa inyaker aser tajungba kümdaktsür," ta pai ashi.

Paisa, "St. Paul VI-i yamai ashi, 'tangar den Khrista osangtajung lemsateptsü tejangrabaji temeshiba nungi adoker, aser ibaji Tsüngrem tanelai sünga aliba temelungjang ka nungi adoker," ta ashi.

"Temeshiba medeni sayutsüngir kati jembiba oji ajanga tanü putu nung nisung ka melungjang nung mekongshitsü aser ibaji tazüngla asütsü, kechiyong ibaji tazüngla o aika jembiba dang asütsü," ta Pope Francis-i ashi.

"Osangtajung lemsatepba mapaji tangar atema dang masü saka pei taküm, Khrista dak amangertem aser Arogo züngsemtem atema-a lir. Asenoki anogo shia melung meyiptsüla, Tsüngrem O agizüktsüla aser anogo shia taküm melenshitsüla. Ibaji nai temelungjang meyipdaksüba lir," ta pai ashi.

"Tenzükba wadang inyakttsü atema pei sasa asüngshiba Arogo kaji Tanela Temeshi nem anidaksüba Arogo ka lir. Arogo kaji mapang ajak nung tejakleni aotsüla aser maneni aintsü nungdak," ta pai ashi.

Onük tembanga Pope Francis-i meimchir taküm ajakji tongtibang, ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Petshi

(v) tera kongshi (slight touch)

\* Kuna süitepdang pai kü dak **petshi**.

Pettaka

(adj) tera agi matong mesüra meperitsü ama (barely sufficient)

\*Par benjong nung chiyongtsü ajak **pettaka** dang renem.

OLONG PAITEP # 6465

15x15 crossword grid with numbers 1-15 indicating starting points for words.

TIPLÉN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6464 TELANGZÜBA


TIPLÉN :

- 1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu, 15. Anünü,
16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sүjak, 10. Aonung,
11. Dokan,
13. Tinu.

Agüja aliba noksa nung meputepi aliba 9 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

Meghalaya: CM Conrad-i sen crore 1592 deficit budget benok



Meghalaya chief minister Conrad Sangma

Shillong, Metsüremi/March 23 (Agencies): Meghalaya chief minister Conrad Sangma-i Brehosibarnü (March 23) 2023-24 atema sen crore 1592 deficit budget ka table süogo.

Meghalaya CM Conrad Sangma-i, Brehostibarnü state assembly nung table asüba budget ya nüburtem atema budget ka lir ta ashi.

Receipts ajak senteper crore 21,781 aser iba nungi revenue receipts sen crore 19,414 shi aser capital receipts crore 2366 lir.

Iba osang ya Meghalaya chief minister Conrad Sangma-i pa indang budget speech nung shisema liasü.

Sen crore 2339 apuba züingtoker receipts ajak senteper sen crore 19,442 shi asütsü ta Meghalaya CM-i ashi.

Paisa, tintoktsü aliba ajak senteper sen crore 22,022 shi asütsü aser iba nungi revenue

nung tintokba crore 17,186 shi aser capital tintokba sen crore 4836 asütsü, ta ashi.

Loan aoba sen crore 988 minoki sen tintokba ajanga senteper sen crore 21,034 shi asütsü.

Pai ashiba agi, 2023-24 atema interest aotokba sen crore 1169 shi aser pension agütsüba sen crore 1794 asütsü ta ashi.

"Ni 2023-24 atema budget benoker koba sen crore 1592 fiscal deficit ka lir aser GSDP shilem 3.42 shi lir," ta Meghalaya CM Conrad Sangma-i ashi.

Meghalaya chief minister-isa, "ni iba budget ya nüburtem atema budget ka ta bilemer," ta ashi.

"Nükjiongji per capital GDP aser Sustainable Development Goals ajanzükba dak sendakba nung temaba jenjang nung aliba state 10 rongnung densemstüba

atema lir. Asenok ajak longjemer yimjiyimjung aser tepela nung aliba Meghalaya ka yangertsü atema merangtsü," ta Sangma-i ashi.

Meghalaya chief minister-i ashiba agi, taruba financial year atema GSDP ya sen crore 46,600 agi timba akümtsü aser growth rate shilem 11.5 asütsü imlar.

Paisa, current financial year atema central taxes shilem revised estimates ya sen crore 7386 asütsü ta ashiba den iba ya budgetary estimates sen crore 6264 dang nungi shilem 18 agi timba asütsü, ta shisem.

Tang benoka aliba financial year atema central transfers ajak senteper sen crore 8706 asütsü imlar kong Finance Commission devolutions aser Centre-i transfer asüba tanga densema lir aser scheme dak sendakba transfer tem densema mali.

PM Modi-i April 14 nü AIIMS-Guwahati semzüksütsü

Guwahati, Metsüremi/March 23 (Agencies): Tawa Assam nung yangluba All India Institute of Medical Sciences (AIIMS)-Guwahati ya April 14 nü semzüksütsü.

Assam nung AIIMS-Guwahati ya Ato Kilonser Narendra Modi-i semzüksütsü.

Iba osang ya Assam chief minister Himanta Biswa Sarma-i lemsatapa liasü.

Assam chief minister Himanta Biswa Sarma-i Brehostibarnü (March 23) AIIMS-Guwahati amenoka aliba tesem semdanga liasü.

AIIMS - Guwahati semdangba mapang Assam CM Himanta Biswa Sarma-i, iba institute lapoktsü atema renemshiba asadanga liasü.

Assam chief minister den külemi state sorkar kübok ketdangsür tejentemi AIIMS-Guwahati amenoka aliba tesem semdanga liasü.

CM Himanta Biswa Sarma meina AIIMS-Guwahati amenoka aliba tesem ya Assam health minister Keshab Mahanta-a semdanga liasü.

"OPD, auditorium, waste disposal aser lenmangtem densema AIIMS-Guwahati

nung infrastructure facilities balala jenjang asadangogo," ta Assam CM Himanta Biswa Sarma-i ashi.

Assam chief minister Himanta Biswa sarma-isa, AIIMS-Guwahati yagi Northeast nung healthcare jenjang tali tajungba kümdaktsütsü, ta ashi.

Paisa, iba mozüki tanen makai süyonga odar aser department 18bo inyaksangshi tenzüksütsü ana nung lir, kong OPD densema lir, ta ashi.

Iba tesem nung mapa shilem 90 tembanga inyakogo, ta Assam CM-i ashi.

Mizoram nung AR-i sen crore 390.4 alang temesepba mozü apu

Aizawl, Metsüremi/March 23 (Agencies): Temesepba mozü shibelenertem nokdangtsü meranga sentong balala benoker inyakba mapang Inspector General Assam Rifles

(East) kübok 23 Sector Assam Rifles, Serchipp Battalion-i Ruantlang, Champhai kübok sen crore 390.4 alang ozüing alema beshiba Triprolidine HCL aser Pseudoephedrine HCL Tablets 39,04,000 ngutetogo.

Iba dak sendakba nung Assam Rifles sepaitemi Bodhbarnü nisung ka puogo.

Temesepba mozü shibelenba

osang tejangja angazükba sülen Assam Rifles aser Customs Department, Champhai na longjemer iba meita aoba sentong ayongzüka agia liasü.

Sepaitemi apuba Triprolidine HCL aser Pseudoephedrine HCL Tablets tem ya shishilembadak sen crore 390.4 alang asütsü.

Temesepba mozü den sepaitemi pua aliba nisungba ya temzüng ozüing dak ajemdaker jenjang tapet agitsü atema Customs Department, Champhai nem bendanga agütsüogo.

Mizoram nung security forces temi temesepba mozü aiben pua arudar aser tang apuba ya temesepba mozü timba apuba rongnung densema lir.

Mizoram nung tang ozüing alema temesepba mozü shibelenba ya tebilemstü tulu ka kümogo.

Northeast tekümzükertem ta jatsüba ama Assam Rifles-i parnok mapa shitak benoka inyaka Mizoram nung ozüing alema inyaksangshirtem anema meita aoba sentong balala ayongzüker benoka arudar.

## Punjab election thinenba ya constitution nung aibelenba lir: Khan



Imran Khan

**Lahore, Metsüremi/March 23 (Agencies):** Ato Kilonser Shehbaz Sharif'er sorkari senotsü maliba ajanga nüngdangba sen aser polling ktdangsur agütsütsü memolungba sülen Pakistan nung election ktdangsurüi tongtipang regional assembly atema election menudaktsür.

Pakistan nung nütsüing yongsük timtiba aliba Punjab province nung legislative assembly atema elections ya April 30 nung agitsü liasü, saka October 8 nü agitsü, ta Election Commission of Pakistan (ECP) ajanga Bodhbarnü sangdong.

Taoba ato kilonser aser tang opposition leader Imran Khan-i ECP telemtetba aitsü aser ibai Pakistan indang constitution nung aibelenba ka lir ta ashi.

"Tanü ajaki ozüing meteter - judiciary aser lawyers - den nokdaktsüla aser parnoki constitution wazüka ayutsü imlatsüla. Tanü ibai agizükra, Pakistan nung ozüing samatsü," ta pai tweet asü.

South Asian linük nung

yimtenren tsütsü mangatetep tali adoker lia election ktdangsurüi iba telemtetba agi, kong rongsenketzüing tsütsü kanga timtemba mapang ka nung lir.

Election thinenba atema ECP ajanga tongtipang kuli agüja alibaji linük nung tensa majungba aser senotsü agi meperiba lir.

Federal sorkar ajanga tekeraba nung election agidaktsütsü nukjidong nung January ita Khan'er Pakistan Tahreek-e-Insaf (PTI) party-i Punjab aser Khyber Pakhtunkhwa province nung assembly anendaktsü.

"Asen Constitution nung jangja-jangja agüja aliba ama anogo 90 tsüingta election agitsü teimla nung onoki provincial legislature ana anendaktsü. Kijai yimsü asütsü janrar kar nem kiralongraba tashi amshia yimsü südaktsütsü, Constitution & Rule of Law aibelentsü atema iba telemtetba ya agiba masü," ta Khan-i Bodhbarnü tweet asü.

Constitution nung aliba ama anogo 90 tsüingta Punjab aser Khyber Pakhtunkhwa province tem nung election agitsü Supreme Court ajanga obendang agütsüba sülen ita tetenzüklen Tir Arif Alvi-i Punjab nung April 30 nü elections agitsü sangdonga liasü.

Pakistan nung akhi mapang nungi national aser provincial elections ya atongtepa agir. Sharif aser party ter dak tema lokteper tentetba sorkari national aser regional elections ya anogo ka nung aginer ta ashir.

Pakistani lawyer aser columnist Asad Rahim Khan-i

nütsüing yongsük million 220 dak tema aliba linük nung ECP ajanga Punjab election menutsü telemtetba agiba ya ozüing mezüingmeshiba aser democracy asoshi takoksa ka lir, ta ashi.

ECP ajanga Bodhbarnü iba telemtetba sangdongtsü ghonda ishika lia Khan-i video ka sayaba nung pa tepsettsü tasa lir ta nenshia ashi.

"Ni ano maneni ashir, parnoki kobi melie ni samatsütsü," ta arishi küm 70 tain taoba mapang cricket asaya alisangi pa busemer dang shinga tenünga metetshie ashi.

"Ni nenok ajak dang tekumdangtsü ashir. Ni pua tepuokdaki yoka mesüra tepsetra, nenoki nokdaktsüla aser ibaji tamakok ama kodanga magizüktsüla. Nenoki tatem tashi nokdaktsüla," ta pai ashi.

November ita linük yimtiba, Islamabad nung public rally ka alidang Khan dak tetsüing nung injang agi akha. Iba sülenbo pa timba Lahore nung par kidang alir, koba Punjab province indang yimtiba lir.

Ita tetenzüklen Lahore nung aliba Zaman Park tesem nung par kidang security forces aser PTI bukumer tsüingta aiben raratepa liasü. Kasaji Islamabad nunga liasü, kong Khan okadak nokdaka liasü.

Pa 2018 nungi 2022 tashi Pakistan ato kilonser inyakdang ozüing alema sorkar meyong sempet tem ayokba nung tai tonglokja aliba ken o nung police aser paramilitary forces temi Khan aputsü merangba pa bukumer temi nokdangba ajanga mepetmesü adoka liasü. Pai aibelenba mali ta ashir.

## Russia-i amokmerenba mechi khuret abener: ICC

**The Hague, Metsüremi/March 23 (Agencies):** International Criminal Court (ICC) ajanga Tir Vladimir Putin asoshi 'war crimes arrest warrant' agütsüba sülen Russia-i amokmerenba atema khuret süa bilemba lemsatepogo.

Taoba Russia tir Dmitry Medvedev-i The Hague nung aliba war crimes court nung hypersonic missiles khaloktsütsü amokmerenba sülen ICC ajanga iba sangdong ya Bodhbarnü agütsü. Ajidang masü Russia nung bushisingdangba telok temabai Putin aputsü tuyur judges aser ICC Prosecutor Karim Khan anema criminal case ka lapokba sülen iba osang ya sangdonger.

ICC indang Assembly of States Parties indang presidency ajanga ashiba agi, general international law kübok nokdanga aliba mapa inyakba yong ochi temai adokdaktsütsü alimai merangba nung timtem agütsütsü merangba atema sasa bilemer.

Assembly ajanga International Criminal Court masetshi bukuma nokdaktsü

lemtetshir, ta presidency ajanga ashi.

"Alima nung mapa tamajungtiba inyakba nungi kumzüka aliba anema külemi nokdaktsü International Criminal Court agi ashir. Tatembangba institution ka asünung, Court yagi national jurisdictions bukumer. Onoki linük ajak dang iba judicial aser prosecutorial independence akumtsübotsü ayongzükter," ta ashi.

"North Sea nungi Russia indang rong ka nungi The Hague courthouse nung hypersonic missile ka khaloktsütsü asoshi bilemetsü takoktsü lir," ta Medvedev-i Hombarnü ashi.

"Nisung ajak Tsüingrem aser rockets kübok jajar... Anüinglen kanga kumdanga repringang..." ta paisa shia liasü.

ICC ajanga Putin aputsü Hukulbarnü sangdongba nung Russia leniri ozüing alema Ukraine nung tanur meyirijang aika pei linük nungi aridok, ta tai tongloktsü, koba war crime lir.

Iba yongji court züingsem linük 123 nung Putin tetsüing ajemokra pa aputsü aser ken o

jembitsü atema The Hague dangi yoktsü.

ICC nung Russia aser Ukraine züingsem masü saka Kyiv-ibo par litsü nung mapa tamajung inyakba merenshitsu atema court nem temelaba agüja lir. Iba bangdak nung par meyong police force mali aser nisung aputsü atema züingsem linük dak metaloka lir.

Kasa ken o nung ICC ajanga Russia indang presidential commissioner for children's right, Maria Lvova-Belova aputsü totuyuba agütsü.

Moscow-i iba totuyuba ya menüingdak ta ashir aser Russia indang tematiba Investigative Committee-ia Putin-i mapa tamajung inyakba mali ta ashir.

February 24, 2022 nü nungi tenzüka linük amakdang Ukraine nung tanur 16,000 dak tema Russia-i yoka lir, ta Ukraine-i ashir aser ICC totuyuba ya telemtetba tongtipang ka lir, ta ashir.

United States aser European Union densema Western linük temi iba mera ya pelashishia agizük.

## ASÜR JEMSENNARO BILEMTETER



Asoba: 27.10.1986 ~ Asüba: 24.03.2021

Nai onok yutsür orr küm ana jungogo, saka nai toktsüba inyakyim tajungtem onoki teti bilemteter. Na onoki teti bilemer aser menungrar. Na onok molongjang nung teti lir.

-Temeim kinungpu, Jala ana aser kinungertem.

## MULUNGEN O



Lt. Nukshisenla (Asangma)

Aso: 14/09/1986 Asü: 19/03/2023

Onoki teti meima aliba jala Nukshisenla, March 19, 2023 anepdang iba lima nungi pila ogo. Shiranga aliba anogo nungi asü nü tashi kija, kibong, lokti balala shirnokisa pei akok yari nübu, rongsen, sarasadem aser shisatsü agi yaria aruogo, nenok ajak dang ozü-i kangasa pelaba lemsateper.

Nenok temeim aser mapa tajung asoshi onoki Tsüingrem tenüing asanger. Tsüingrem tulusangi nenok ajak teti moajangma.

-Temeim tsürabur, adianutem aser kinungertem.

## Equatorial Guinea nung Marburg cases ti jangjaogo: WHO

**Metsüremi/March 23, 2023**

**(Agencies):** Equatorial Guinea nung Marburg tashidak nisung tasen ti dak jangjatetba osang lir, ta World Health Organization (WHO) ajanga Brehostibarnü ashi.

Iba ya ajanga laboratory nung jangjatetba cases toku akumer aser tashidak poktetba sülen iba tashidak alitsü südi ta bilemba 20 akumer. Iba tashidak ya Ebola den mesükteper aser February ita sangdonga liasü. Iba tashidak ajanga nisung 20 asüba osang lir.

"Item cases tasen jangjatetba tetetzü menatepa aoba süngzü tekeraba nung anendaktsütsü meranga telangzüba tali agitsütsü temaitsü tongtipang ka sayur," ta WHO Africa Director Matshidiso Moeti-i sangdong ka nung ashi.

Cases tasen ti rongnung ana Central Africa linük indang Kie-Ntem province nungi lir, pezü Litoral province nungi aser ana Centre-Sur province nungi lir, ta WHO ajanga sangdong ka nung ashi.

Iba tashidak putetba tesemtem ya mile 93 shi agi pilar lir, anungji virus ya tesem balala nung menatepa aoba sayur, ta WHO-i ashir.



Marburg virus tashidak ya viral haemorrhagic fever lir aser iba tashidak agi meneper shilem 88 tashi asür, ta WHO ajanga ashir.

Iba tashidak agi meneper temang metar, temang lular, azü keter saksür aser tepok aor. Iba tashidak anepalutsü atema vaccine mesüra antiviral treatments kecha mali.

Kidanger Cameroon linük nunga taoba ita Marburg tashidak südi ta temolung melemteti cases ana puteta liasü. Iba tashidak memenatsü mechi arütsülen senzüsempogba nokdanga liaka iba osang angashir.

Mongulbarnü Tanzania nunga Marburg cases ti jangjatetogo aser item rongnung tasüba pongu liasü, ta WHO ajanga ashir.

## ISSF World Cup: India ano medal ana nguogo



Varun Tomar aser Rhythm Sangwan nati 10m Air Pistol Mixed Team tetoktepa nung shilver medal agizükba noksa angur.

**Metsüremi/March 23, 2023 (Agencies):** Tang M.P. Shooting Academy Range, Bhopal asaya aliba Rifle/Pistol International Shooting Sport Federation (ISSF) World Cup nung tanabuba anogo asaya anaprongla nung China-i gold medal nguogo aser kasa mapang nung India-ia asaya ana nung ya silver aser bronze medal nguogo.

Tebur 10m Air Rifle world championship tesüsuba koker aliba asayar Rudranksh Patil aser R. Narmada Nithin nati 10m Air Rifle Mixed Team tetoktepa nung bronze medal angu aser Varun Tomar aser Rhythm Sangwan nati 10m Air Pistol Mixed Team tetoktepa nung shilver medal ngua liasü.

Anogo ana asayaba sülen

India-i tang tashi nung gold ka, silver ka aser bronze medal ana ngua lir. Kasa mapang nung China-i gold asem aser bronze medal ana ngua parnok temaba jenjang nung lir aser Azerbaijan, Germany aser Hungary nungeria tang tashi nung medal kaka ngua lir.

Brehostibarnü mezüngbuba medal event; 10m Air Rifle Mixed Team nung India nunger tarep Rudranksh aser Narmada nati qualification nung point 632 ngua tasembuba jenjang nung tembang aser ibayongji China nunger Zhang Qiongyue aser Yu Haonan na den bronze medal atema asayatsü qualify asü. Bronze medal atema asaya nung Rudranksh aser Narmada napronglai kanga junga asaya

aser China nunger tarep ya 16-8 agi koka liasü.

Team anapronglai 10-mark tekübok shot ka danga maka. Ajisüaka series trokbuba nung Rudranksh aser Narmada napronglai perfect 10.9s khateta liasü.

India aser China napronglai Mixed Team Air Rifle tetoktepa nung team anana yoka liasü. China nunger tarep Huang Yuting aser Sheng Lihao nati final asaya nung Hungary nunger asayar Istvan Peni aser Denes Eszter 16-2 na ayong ayonga koka liasü.

Brehostibarnü final medal event tanabuba, 10m Air Pistol Mixed Team tetoktepa final nung India nunger tarep Varun Tomar aser Rhythm Sangwan nati 11-17 agi China nunger tarep Qian Wei aser Liu Jinyao na mekoki liasü. Mezüngbuba anogo Air Pistol event nung bronze medal anguba sülen Varun Tomar-i iba asayamung nung medal ana nguogo.

Final asaya tenzüklibo China nunger tarep yagi ayong ayonga akoktsü ama liasü, ajisüaka India nunger tarep yagi kanga junga asayateta 15-7 aliba 15-11 aküm saka China nunger tarep yagi series 15buba koka gold medal angu. Qualification nung Qian aser Liu nati point 586 ngua tena temaba jenjang nung tembang aser Varun aser Rhythm (581) na tanabuba nung liasü.

Maneni Hokolbarnü 10m Air Rifle Men final 11:15 ako nung tenzüktsü aser 10m Air Rifle Women final 1:30 nung tenzüktsü. Qualifications 9:00 ako nung tenzüktsü.

## Swiss Open: Sindhu aser Prannoy na Pre-quarters-i iogo



**Metsüremi/March 23, 2023 (Agencies):** Tang asaya aliba Swiss Open Super 300 badminton tournament nung India nunger asayar HS Prannoy-i, China nunger All England Championships finalist Shi Yu Qi koka tebur kija asaya pre-quarterfinals-i iogo.

India nunger tebur kija asayatem rongnungi taküm World number 9 Prannoy-i dang junga asaya arudar aser iba asayamung mezüngbuba round nunga pai kanga junga asaya-a 21-17 19-21 21-17 agi Shi Yu Qi kokogo, shiba 2018

world championships silver medalist lir.

Tetsür kija asaya nung Olympic nung medal ana tashi koker aliba fourth seed asayar PV Sindhu-ia mezüngbuba round nung kanga junga asaya Switzerland tsür Jenjira Stadelmann 21-9 21-16 agi ayong ayonga koka liasü.

Prannoy taruba asaya France nunger asayar Christo Popov den asayatsü aser kasa mapang nung Sindhu, arishi küm 20 tain Indonesia tsür Putri Kusuma Wardani den asayatsü, shiba 2022 Asia Team

Championships nung gold medal akokba Indonesia team nung densema liasü.

Kasa mapang nung India nunger asayatem rongnung Kidambi Srikanth Hong kong nunger asayar Lee Cheuk Yiu den asayatsü, National champion Mithun Manjunath Chinese Taipei nunger asayar Chia Hao Lee den asayatsü aser India nunger tarep Satwiksairaj Rankireddy aser Chirag Shetty na Taiwan nunger asayar Fang-Chih Lee aser Fang-Jen Lee den asayatsü lir.

## Mesut Ozil asaya nungi anener

**Metsüremi/March 23, 2023 (Agencies):** Taoba mapang Germany nunger asayar Mesut Ozil-i arishi küm 34buba nung football asaya nungi anenba Bodhbarnü sangdongogo.

Taoba mapang Real Madrid aser Arsenal nungi asayar ya 2014 küm Brazil nung Germany-i World Cup akokba team nung tongtibang asayar ka liasü.

Germany nunger migrant tem aika senoka aitba dak sendakba nung timden yimsüsüba tsütsü mangatettep adokba aser Turkey tir Tayyip Erdogan den noksa ka agiba sülen pa Turkey nungi jakzükba dak sendakba nung pa mesenmetui amshir ta shia pa 2018 küm Germany team nungi asaya anen.

"Ni küm 17 shi professional football asayar ka ama asayatsü asoshi maongka ngua aruogo aser iba maongka atema kanga pelar," ta Ozil-i ashi, shiba tesüsa Turkish club Istanbul Basaksehir nungi asaya liasü.

"Saka hopta aser itatem tsüngda yiruba ajanga ni football asaya nungi anentsü atema mapang tongogo ta jangja aküm," ta pai ashi.

Ozil-i club aser linük tenüng nungi 645 ben asayaogo aser iba mapang pai goal 114 idaktsü aser assist 222 süja liasü.

Pa senior career ya Germany nung Schalke 04 nungi tenzükaser iba sülen Werder Bremen-i ao. Pai kanga junga asayaba atema 2010 küm World Cup atema Germany indang squad nung züngoksem

aser par team semifinal tonga asayaba nung teyari tulu agüja liasü.

World Cup tembangba sülen ita ka lir pa Real Madrid puri alizük aser Spain nung küm asem asaya liasü. Spain nung asayaba mapang pai LaLiga title ka aser Spanish Super Cup ka kokogo. Ozil-i Real Madrid nungi 105 ben asaya aser iba mapang goal 19 idaktsü.

Maneni pa 2013 küm Arsenal nung arua aden aser club-i FA Cup pezü koker aliba nung mezüngbuba akokba nung teyari agüja liasü. Pai Premier League nung goal 33 idaktsü aser assist 59 süja liasü.

Brazil nung 2014 küm World Cup asayaba mapang pai Germany team atema kanga tongtibang shilem agi aser asaya tenetprongla nung tetenzük nungi asaya liasü. Iba World Cup akokba sülen Germany ya South America nung WC akokba mezüngbuba European team aküm.

Arsenal-i pa den tenanzüktepa yanglur aliba tembangtsüba sülen Ozil 2021 küm Turkish club Fenerbahce nung oa aden aser küm ka majung tsüngda Istanbul Basaksehir nung oa aden.

"Ni Schalke 04, Werder Bremen, Real Madrid, Arsenal FC, Fenerbahce, Basaksehir club tem aser coach tem aser team mate tem shirnokisa kü nem teyari agütsüogo parnok ajak dang kanga pelar," ta Ozil-i ashi.

## Iga Swiatek Miami Open & Billie Jean King Cup nung masayatsü

**Metsüremi/March 23, 2023 (Agencies):** Tetsürtem rongnung World No. 1 asayar Iga Swiatek-i, la kanga aketba agi tesaret nung timtem aliba ajanga Miami Open aser Billie Jean King Cup nung shilem magitsü atema telemteba agiba sangdongogo.

Taoba küm arishi küm 21 tain asayar yagi Miami Open final nung Naomi Osaka koka liasü, ajisüaka taküm la iba asayamung nung shilem magitetsü, ta Xinhua sangdong ka ajanga metetdaksü.

"Doha nung asayaba sülen ni kanga timtema liasü. Ni asayatsü asoshibo temelaba agütsü, ajisüaka ni kanga aketba ajanga tesaret nung timtem adok. Iba timtem ya anepalua onok maneni asaya kechiyong ni asayatetsüsa liasü," ta Swiatek-i Bodhbar aonung ashi.

"Onoki anogo ishika tsüngda data asadanga aruogo aser kü

indang doctor-i ni temang anepalutsü atema renemtsü. Tia maka ni ano temang tajungba maküm aser tashiba lir anungji masayatetsüsa kümogo. Ni Miami Open aser Billie Jean King Cup nung masayatsü telemteba agiogo," ta lai ashi.

Swiatek kodang nungi asayatetsü iba indang osang kecha magütsü. "Ni temang koda taneptsü angur iba dak keta lir aser kü medical team-i kechi tuyudir iba sülen anidaktsü," ta Swiatek-i ashi.

WTA ranking nung temaba jenjang nung aliba asayar yagi la tang timtemba mapang ka lir ta ashi.

"Miami aser Billie Jean King Cup nung masayatetba atema kanga sasar, saka health ya ajak dang tongtibangba. Ni iba ya agizükteta takaratiba nung taneptsü angutsü merangtsüla," ta lai ashi.

## BILEMDANGANG

"Yimya tamajung sübaba agi nüsasa tekangshi."